

上清靈寶大法卷之三十

飛六

上清靈寶大法卷之三十

飛六

洞微高士開光救苦真人審全真授

上清三洞弟子靈寶領教嗣師王契真纂

傳度科格門

師曰凡開壇傳度隨力爲之若有力之家
當預行申發至晚敕水禁壇宿啓行科亦
如齋法次日昧爽登壇三時朝奏至晚下
設醮傳度尤爲盡善往往世俗從省止於
設醮而已故宿啓朝科罕得備載靈寶大
齋道場三朝科文亦從更改行用今且敘

其傳度醮式乃受法謝恩之禮非黃籙齋
儀量其輕重行之可也

靈寶大法傳度醮科

各禮師存念如法請宣神呪

蕭仞扶桑方諸鬱霞元皇列真凝結雲芽明

飛六

曜九芒含炁三華鑷天振劔神虎辟邪安陽
大帝攝御群魔上升玄都濯形天河

和與道合真

炎炁浮煙運升赤明長生元聖高居玉京降
妙玄羅散晶六冥元天大誥普濟群生消殄

魔試奔飛火鈴保衛正炁億劫長寧

和與道合真

皓景金華長庚洞光大梵流布輪轉元網蔚
明交變騰化十方七關安鎮回合陰陽帝炁
蕩蕩我享嘉祥玉文敷告生道延昌

和與道合真

太陰朔單上連帝居流燄騰晶化形玉虛輔
衛三境簡閱元圖真符煥發定籍青都標名
金籙宿釁咸除飛升碧落超登太无

和與道合真

元始虛皇集炁居中三境洞杳肇生穹窿七
轉九靈混合回風變化萬神天地開通吉日
行事萬魔斷蹤晨暉朗照默運元功建魔散
花執節太空十方普度劫運无終

和與道合真

飛六

二

法師長跪出官如法

臣謹出身中五體真官功曹將吏開化度道
陰陽功曹消災散禍解厄君吏各一十二人
出某治中建節監功大將軍直使功曹陰陽
神決吏各二人出出者嚴裝駐立營衛匝繞

臣身郎吏虎賁察奸鈞騎都官僕射天丁力士治正執正收神食神吏收毒食毒吏收精食精吏收邪食邪吏誅符破廟吏剗風騎置吏驛馬上章吏飛龍騎吏等官並皆屯駐臣左右前後受臣詞語關啓此間土地里域正神治化靖廬名山洞天福地海嶽太歲官君法中將吏等神謹同誠上啓太上无形无名虛无自然至真大道无上元尊金闕玉陛下臣受法之日約以流通濟物是先接人爲急今謹有奉道某人丐爲進拜詞文上祈玄感

當令臣所祈者達所告者應所誅者却所禳
者度功曹將吏飛龍騎吏分別關啓以時上
達列啓事竟各還臣身中復於宮室後召復
到一如故事

謹稱法位

飛六

三

具位臣姓某謹同誠上啓

玉清聖境元始天尊上清真境靈寶天尊太
清仙境道德天尊昊天玉皇上帝南極天皇
大帝北極紫微大帝承天效法后土地祇神
霄玉清真王長生大帝東極青華大帝諸天

上帝高真日月星斗列漢高真三官大帝四
聖真君上清靈寶大法玄中大法師靜老天
尊三天大法師靜應真君上古經籍度三師
真君太極仙翁真君九天神功妙濟真君黃
籙三師真君三洞四輔經籙神仙僉書雷省
浮丘真君傳經傳法師君真人法籙天仙官
將吏兵玄壇與降三界十方上聖高真恭望
洪慈洞開靈鑑臣聞无形无名即玄真之妙
蹟有光有象乃神化之靈機混成宇宙之先
肇造乾坤之本分茲一炁育彼三才宰制萬

靈陶成庶類於是元網啓蘊立萬劫之根宗
大梵發揮漏九清之祕典三洞流布九品宣
行蓋以闡於化機亦以彰於道要因師尊之
開度亘今古以欽承臣猥慚庸鄙之資叨綴
班行之末濫司至教竊眄靈篇所宜隨力以
宏科不敢因人而廢事既能潔已以進當開
勤道之途授受不窮所以副大教作成之意
傳流有格理須祈高真監度之恩是用瞻紫
極以投誠望碧霄而稽首不揆菲儀之瀆輒
延玄極之尊伏願五色慶雲擁擲火流鈴之

仗三華黃道降飛龍唱鳳之車衆聖臨軒群
真就列臣等百神震惕一念精純拜手天墀
祇迎聖駕

請列聖降帝行初酌

重宣法職

飛六

具位臣某謹重伸上啓

三境高尊萬天上帝十方无極太上靈寶天

尊靈寶大法歷代師真三界十方上聖高真

臣聞道本无言因經科而立教化垂有作出

法錄以度人九品三乘迤相通貫六書八體

互以發明傳於天中爲萬聖指歸之路降乎
人世開群生修進之門自非歷劫之良因安
得一窺於正典而況教綱精練始可爲師志
慮清高乃容受法立功建事上以贊於玄猷
勵行飭躬內以檢於九質科條至重付受不
輕如臣本匪良資實无達識五芽三素豈知
鍊習之源六慾七情徒逐沈迷之浪所當省
已安可接人蓋以立誓盟心登壇受職雖戒
張皇而妄泄不許緘祕而失傳況承勤懇之
辭願被正真之化豈以臣之不才終加折絕

幸其人之有志僭爲申騰然雖昧通真達靈
之機猶不敢傳叛道罔人之法爰稽彛典用
闡靈場奉高真之有臨仰帝尊之在御輒披
凡情上瀆宸嚴傳度表詞文謹當宣奏

宣詞表焚燎

飛六

五

按如詞言情忱堅切義當接引不敢遜辭臣
聞靈寶神章洞玄上品延康之始莫測其端
龍漢之初漸彰其妙結飛玄之玉炁成隱祕
之靈音發五鎮之根宗經四譯而昭布寧家
國以贊帝王之治調陰陽以輔造化之功上

聖高真莫不因茲而證道沈靈苦爽豈非乘
此以升遷實萬品之津梁乃衆靈之軌範雖
巍巍之典傳度不輕然浩浩之功包容无外
重念臣迂踈末學謬居師匠之階嗣法某塵
陋凡資僭受仙靈之職事俱越分理實愧心
尚祈天造之垂憐更冀師恩之覆育許容付
度俾遂進遷真階早紀於玄都罪目悉除於
黑簿不經魔試漸入仙宗顧冒瀆之至繁惟
凌兢之无任再陳二酌以罄丹誠臣等再拜

實恭禮行亞獻

實實天尊

舉十方靈寶天尊

度師跪奏宣念

臣聞元始祖劫化生諸天隱碧落之空歌敷
紫虛之鬱秀開明三景用普植於神靈敷落
五篇使保制於劫運懸坐五色獅子之上說

法度人端居七寶騫林之中授經付世萬聖
臨軒而稽首衆真侍座以皈依皆諸天隱祕
之音非世上常辭之詠靈風橐籥致日月以
停輪金口宏敷俾神風而靜默一徧而諸天
稱善十迴則枯骨成人是知妙道難窮玄功

无量上天所寶下世不傳遇至士以赤心齋
金繒而盟受衆真監度萬聖臨軒諸天保以
善傳魔王舉而道備方遵玄格許進清班以
今弟子某肘步投壇持心受法臣早膺師旨
獲佩靈文本接物以度人遇至賢而勿祕有

飛六

六

來懇願遂啓上玄已獲報於吉祥消良辰而
付授給符傳法授戒度兵伏望靈寶衆真高
虛列聖慈悲濟物方便度人俾弟子某迴出
塵寰永離浮幻蕩六根而清靜出八難之輪
迴頓悟玄機得行道妙隆三千之功行招集

群仙總五帝之魔王萬靈振伏臣與弟子稽
首再拜宣讀投詞

念授詞後嗣法弟子再拜跪白

嗣行靈寶大法具位臣姓某誠惶誠恐稽首
頓首虔誠再拜上啓

金闕三境高尊諸天上帝十方无極太上靈
寶天尊靈寶大法歷代師尊願賜矜憐俯垂
鑑錄臣千生慶幸一旦遭逢嗣法傳真遷階
進職永堅素志不敢負心倘渝誓盟甘從譴
罰今與度師分環裂券立誓飲丹伏望證明

容臣受度臣下情无任懇禱之至再拜謹言
舉度人无量天尊

師與弟子回班對立師啓白宣戒弟子對
上長跪聽受

恭聞靈寶之道洞玄之宗其妙難名度人无

飛六

七

量受之者功超七祖修之者形陟九霄乃萬
法之靈樞總十方之正教德之至大深不可
詳固當修其所當修尤當戒其所必戒受持
不替真仙可階今對三尊先明十戒

舉智慧生戒根頌

第一戒者无忘八極忠者欽之極孝者順之極齋者戒之極寬者廣之極裕者樂之極容者和之極忍者智之極天以北辰爲極地以山嶽爲極屋以棟爲極天以有極則能聚衆烝地以有極則能聚衆形屋以有極則能聚衆木人有八極亦如是也故能立衆善善立則道備道備則所聞見自然開渙所應自然調適此得靈寶度人之基也

第二戒者无忘鑑水鑑者喻心水者喻性心明則萬法皆照性靜則五濁不歸道之在人

圓通非蒙蔽可了亦非躁動可達託鑑水而
悟心性此得靈寶度人之體也

第三戒者无忘日錄日錄者所以修檢善惡
人之處世患不自知患不聞過患不聽言則
无所益今以日錄錄日之所爲不可不筆處
皆已之非也改之爲貴則日錄者乃不教之
師不說之友不詔之君父不約之法度也不
可忘之此得靈寶度人之想也

第四戒者无忘追度安鎮且人之所親不過
父母所尊不過君上父母君上之德恩必報

之者追度安鎮是也追者謂誦經行持上爲
祖父六親之過去者以資冥路度者謂誦經
行持上爲祖父六親之見存者以資福筭安
鎮者謂誦經行持上祝聖壽安鎮四方召龍
行雨驅妖馘毒保護民物禳度星躔皆其一

飛大

八

也其或在家行祖父之志或居官分君上之
職種種利益有可報稱皆即爲之凡木之落
葉尚糞其本根則歸根復命之義也人之報
本反始不可不勉此得靈寶度人之宜也

第五戒者无忘治救之術慈憫所先凡有病

者爲其誦經行符至誠讓却如已至愛男女
父母凡有方便種種惠澤皆盡其心如蒞官
行政務布陰功寬平設法三省而行再思而
動其或修治橋梁當道種植有益於世皆力
行之夫人之有慈念如木之有根人而不仁
不達於禽獸故猩猩活象義鷲搏虵拔難有
如此者可思之此得靈寶度人之由也
第六戒者无忘服鍊之術參同天地效法陰
陽念念正真存存不缺則自然超脫變化无
方今之蟲豸有外捨陸走而至飛翔地脉川

遊而遂奔逸在物既爾於人當然此得靈寶
度人之方也

第七戒者无忘剗潔剗則有守不行非淫潔
則戒行不慕非食不嗜非淫則不損身之精
神不慕非食則不殺物之性命見人妻女如

飛六

九

已之所親見物性命如已之所生自然精神
全而寬對少此得靈寶度人之實也

第八戒者无忘儉約凡所求物當知皆元始
祖炁化生灰水蕩穢不用修飾粟菽充飽不
用珍庖此得靈寶度人之福也

第九戒者无忘願約願者從初入道時時發
心約者既入道後設誓天地神明司之毋輒
中變科戒不可不守此得靈寶度人之念也
第十戒者无忘師友師者所以教友者所以
勸教者似父勸者如兄孰爲父兄可不欽重
毋委棄于此得靈寶度人之宗也

舉奉戒不暫虧頌

上來所宣十戒乃是師傳尊授發明古經夫
經者蘊道之機法乃體經之用欲遵正教修
勤爲先守之行之毋得中怠億曾萬祖幽寬

昔爽皆即受度上升朱宮惟修之益勤學之
不已功滿德就皆得神仙飛升金闕遊宴玉
京子其勉之

次傳經文

謹按經云上學之士修誦是經而通微奧即
得飛度南宮不經地獄普度無窮一切天人
莫不受慶無量之福生死蒙惠上天所寶不
傳下世至士齋金寶效心盟天而傳輕泄漏
慢殃及九祖長役鬼官侍經五帝玉童玉女
各二十四人營衛神文保護受經者身聽受

之後敬而持之

次傳法訣

原夫道法自然功施不宰本強名而至妙極
元化以无形洪惟靈寶大法大有金書實元
始之希夷乃至虛之冲寂淵宗莫究妙理難

飛六

十

窮祕大羅金闕之天垂浮黎寶珠之旨諸天
欽仰萬聖護持夙有善根方能窺奧今弟子
某虔心稽首誓受祕詮首露十方盟誠三界
願窮至理體道度人恭對聖前受持大法伏
望玉京元老金闕至真遣玉女飛函捧金章

而廣示命金童稱善敷寶笈以流傳使弟子
某覓神澄正萬烝長存不經苦惱身有光明
三界侍衛五帝司迎萬神朝禮名書上天功
滿德就飛升上清受而行之毋容輕泄

次度法印

原夫法有階梯職分品級凡欲司於號令合
先佩於印章文移關奏賴以宣行呼召指揮
資以合契上天所寶非人莫傳既齋信以效
盟用依科而付授是故兵隨印轉將遂令行
惟在受持必期嘉應

次度法劍

原夫代天行化布令宣威全憑三尺之神鋒
以制群魔之非道光騰七曜威攝萬靈凡有
指呼无不響應吾今付汝切宜珍藏

逐一度畢師與弟子執筆立誓

飛六

十一

師念云回筆指天弟子曰上不負天臣若負
天七祖受刑天若負臣日月不明師云回筆
指地弟子曰下不負地臣若負地身受刀兵
地若負臣草木不生師云回筆指心弟子曰
臣不負心臣若負心合門不生心若負臣道

化不行

舉法緣常濟天尊

次剖券分環

夫環券者所以結誓三官告盟十天永堅信
誓度師不敢隱真出偽弟子毋得叛道背師
分環永不渝盟裂券永不負誓始勤終怠五
帝錄愆敬佩精修九天同福對聖被受終身
寶持

師執券左邊弟子執券右邊當中以刀劃

破給券誓約弟子跪云

筆指東方九炁天中靈寶天尊真人神仙玉
女玉童靈官仙兵今日欣慶受度歷關諸天
請滅三惡斬絕地根飛度五戶名列太玄魔
王保舉位寄玉清九玄七祖拔出地獄皆即
受度竟升南宮令臣過度三塗五苦八難九
厄千災萬禍功滿德備玄師度引超凌三界
逍遙上清內功外備過度三界位登仙翁諸
魔滅試三官散形嘯命雷雷呼吸風雲役召
丁甲叱咤鬼神降致千真役使萬靈摧伏惡
毒拔度幽明收束虎豹斬馘鬼精拯運鎮劫

保佑安寧佐天行化助國救民調泰五炁受
天經緯內鍊成真坐致行厨所向利貞若有
不神天地盟臣臣今歸神歸身歸命三寶之
尊若有異志始勤終怠叛道侮法輕泄漏慢
違背師旨不生敬信不依年限亂傳非人不

飛六

十二

忠不孝淫烝毀棄陰謀殺害甘伺天憲先墮
祖考後累玄孫永沈北酆一身罰功隨事風
刀考形三掠更生非道之形萬劫永不希仙
甘心自受以明違天逆地叛道背師負心惡
逆之誠不敢怨道咎師急急如

靈寶大法律令敕

次劃券言誓

上元天官中元地官下元水官四方天帝五
方五帝日月星辰四極真人受度三師玄中
證明劃券之後誓不負天誓不負地誓不負

師忠於國家孝於父母慈於衆生哀救苦爽
以善濟物誓不違盟若有違盟甘伺天憲備
經三塗之役償於五苦之考急急如律令

右師與弟子各執一環以刀於中割斷青

絲以代截髮次刺血飲丹盟誓

截髮誓天刺血爲盟飲丹結願仰告天尊三
官保舉五帝證明三師受度諸天書名北斗
落死南斗上生萬真受事天魔敬形七祖父
母寄鍊南宮功成之日上詣玉清負心違誓
臨事不神一如律令

飛六

十三

師捧硃盞執筆白云

付度已訖軟血重盟以丹代血各堅其心飲
此丹華通真達靈中理五炁混合百神十轉
回靈萬炁齊仙

次師以丹水嘆于弟子身白云

一嘆三清上聖度二嘆十方至聖度三嘆三界衆真度

令弟子飲丹水一口

以環券各收貯師再持環券祝曰

天地合信環券爲盟行信忠孝心清緬平慈
仁愛敬言真潔身始終如一其道合神勿生
諂諛以起貪嗔損身破德三界不遵今分環
券其義斷金

分環券與弟子

宣版券

次度仙誥

汝以夙鍾慶幸獲際真風既契佩於靈文已

恪守於盟誓宜給仙誥俾列清班惟在受持
毋忘修檢

宣仙誥

次受交兵帖

既膺天寵得進仙階今悉按於玄科授應干
之法器其有本司官吏合部仙曹用對聖以
交承俾分神而治事宜給照帖以正攸司

宣帖後師祝云

靈寶經法萬天所崇今日受度三界欽從諸
天書名列位仙翁帝君大聖普告无窮无量

度人我道興隆

弟子受帖謝恩祝曰

臣某賦性昏蒙植資凡下寵承帝賚名厠真
儔既堅金石之盟已佩筌蹄之旨雖由際會
實愧僥踰臣敢不益勵素心永棲玄範上贊

飛六

十四

无爲之化期收濟世之功臣无任激切謝恩
之至謹稽首再拜弟子三禮

師重啓宣醮科

臣等謹重伸上啓三清上帝萬天至真靈寶
大法立教師君經法錄部天仙官將三界十

方上聖群真臣聞道在人弘法因師度繼承
不絕乃能敷暢於真風流布無窮所以恢張
於大教梯航後學橐籥含靈作成輔正之功
益廣度人之路臣稟資苦薄練素未精莫遇
至人難明真奧茲濫當於傳度實有愧於公
微幸蒙師造之垂科許以流行而接物是用
盟天露懇過印交兵陳薦獻以惟恭獲威儀
之粗畢念未全於豐潔誠有瀆於真靈咸祈
曠蕩之恩普宥踈虞之戾即使某早乘良普
頓悟玄機進修無魔障之干道法契神靈之

助呼吸有應關奏潛通積濟生度死之功得
固蒂深根之妙上願真風昭闡至教宣行日
麗月明天清地靜帝壽等南山之固久丕圖
同磐石之尊安宗廟怡神官僚振職邊陲絕
警黎庶相安次冀受道師尊生身父母見存
獲慶已往遊仙谷隱巖棲期早圓於行願跂
行喏息俾咸遂於生成巨等謹稽首再拜寅
恭以陳終獻

飛六

十五

宣龍車表疏

次法師序立稱職重啓

具位臣姓某等謹重伸上啓

卷

八

金闕至尊瑤宮上聖臨壇傳度諸大師尊三界十方群真衆聖臣聞道虛善應天高聽卑故茲傳度之壇特沐鑒觀之澤深虞屢瀆仰丐寬容今則補授事終醮修禮畢仙凡有間儀衛難留清蹕收聲已返瓊都之仗紫雲斂彩曷瞻玉駕之光真靈隨治以榮還官將分神而駐劄徒深懷感倍切傾馳臣與弟子无任激切攀戀謝恩之至謹稽首再拜奉送法衆送聖焚疏狀回向禮畢

謝官將三獻文

六回回對畢

伏以百魔隱韻使離合之自然三景開明周
大行之梵炁无上大羅之境端居元始之尊
出法度人有返形之微妙傳經流世敷起死
之玄功侍其經者八方威神衛其法者諸天
上聖五帝大魔之所治十方使者之攸司至
學既已盟傳魔王舉其道備遵上天之禁洛
露祭醮於靈壇名制十方御地祇於要妙歟
齊天政束魔鬼於真文修行其旨則萬聖臨
軒誦詠是經則諸天齊到輔我法者聞呪訣

而出有入无佐我道者承符命而濟生度化
中理五炁混合百神今者謹按科盟備陳蘋
藻伏望森森隊伍咸來顧以來歆濟濟威儀
享既蠲而既潔恢弘教法懋積玄勲神鑑在
茲謹陳初酌

飛六

十六

伏以靈寶本章乃重玄之蘊奧上品妙道爲
大法之根宗或傳布於人寰或秘藏於天府
宗奉敬禮者得道輕泄漏慢者招殃吾以宿
命因緣恭參大法既蒙師而付度當備物以
謝恩仰惟至聖之聰明俯鑑菲儀而盼蠶所

冀威光赫奕輔正教於玄壇靈造昭彰積陰
功於凡世退慚末學泰遇明師雖憑宗教以
行持惟藉神功而贊助斷絕禍源則剪形截
首申明號令則欽振提綱拯幽濟顯則无所
不成建德立功而有求皆應毋令懈弛有背

盟言幸對威容恭陳亞獻

伏以道无人而不立人非道而不行是知道
用人宣人從道立當職謬參玄奧叨進仙階
自慚寡德以无堪惟藉至神而是相伏冀分
司部伍共嚴整於法壇森列旌旗各鎮安於

靖治坐名立呼則斯須響應行神布炁則烜
赫靈通輔吾道以立功守斯盟而謹節上贊
玄元之化不忘終始之修嘉績有成嚴班可
進今者詞多屢瀆禮盡三行不違方寸之誠
俱賴聰明之鑑謹當終獻以謝威光

卷六

十七

上清靈寶大法卷之三十一



